

卷五

廣文選卷第一

明通議大夫都察院右副都御史大庾劉節廣

天地廣

天地賦

成公子安



惟自然之初載兮道虛無而玄清太素紛以溷淆兮始
 有物而混成何元一之芒昧兮廓開闢而著形爾乃清
 濁剖兮玄黃判離太極既殊是生兩儀星辰煥列日月
 重規兮動以尊地靜以卑尋明迭炤或盈或虧陰陽協
 氣兮謝寒暑隨時而推移三才殊性五行異位千變
 萬化兮育庶類授之以形稟之以氣色表文采聲有音
 律焉無方流形品物鼓以雷霆潤以慶雲八風翱翔

書名 廣文選八十二卷 嘉靖十二年序刊本
 撰者 明 劉節 輯
 卷 卷五
 內容分類 集-總集-詩文
 索書號 大木-集部-總集類-3
 編號 D7920300

彩色首頁

東洋文化研究所漢籍目錄 編號: D7920300

東洋文化研究所漢籍目錄所藏漢籍善本文影像資料庫 索書號: 大木-集部-總集類-3

漢籍善本文影像資料庫文本廣文選八十二卷 嘉靖十二年序刊本

版權所有: 東京大學 東洋文化研究所

使用上的注意事項

以楊葉爲關南陵以梅根作冶小山則藜桂留人扶風
則長松繫馬豈獨城臨細柳之上塞落桃林之下若乃
山河阻絕飄零離別拔本垂淚傷根流血火入空心膏
流斷節橫洞口而歆臥頓山要而半折文衰者合體俱
碎理正者中心直裂戴瘰銜瘤藏穿抱穴木魅踴睽山
精妖孽況復風雲不感羈旅無歸未能採葛還成食薇
沉淪窮巷蕪沒荆扉旣傷搖落彌嗟變衰淮南云木葉
落長年悲斯之謂矣乃爲歌曰建章三月火黃河千里
槎若非金谷滿園樹即是河陽一縣花桓大司馬聞而
歎曰昔年移柳依依漢南今看搖落悽愴江潭樹猶如
此人何以堪

廣文選卷之第四

江都葛澗校

廣文選卷第五

明通議大夫都察院右副都御史大庾劉節廣

志上

徵詠賦

宋玉

蔓馳年之騷思黜徂夜之悄憂念怳惘以淪忽心震懽
而勞流坐生悲其何念徒空詠以自憫于詠之爲情也
悵望兮若分江晶素厓翔傷兮濫行雲再清離浩宕弘
以廣度紛收息而淹儀旣御聲以跼制又繫韻而發羈
青塗鬱兮春采香秋色陰兮白露商謹鳥翾兮山光開
長霞流布兮林氣哀于時也深衷美緒孤響端音屬素
排滿吐致施英嘈肆懷以鴻暢慘輟意而相迎馮幽圖
以藉怨咀高華而寄聲體閒愔而都靡心遊任而姝

濯陵奇而壽志舒容綺以昭情占風立候睨天發暉精
慮方蕩中置忘歸慨矣挫歎默矣析機鐘石墮晚琴瑟
林帷重瀏愴以徐吟若變宮而下徵首廉麗以輕榮終
溫愛而調理曆貞旋以弘觀留雅恨其誰止爾來承芳
遺則度律聞韶回白雲以金讚戾秋月而玉寥臨洪流
以浩汗履薄冰而心惓惓君子之叢秀鏡淑人之靈昭日
月會兮爭鶩朝夕見兮玄塗楹萃兮開表窆壇兮橫蕪
龍義驛兮終不昭松延蔭兮意沈虛歡陽臺兮迅飛路
闕陰榔兮空長居去矣回復參咤榮身四脩匪聊亂而
剽越空含嚼而動神亂曰簡情撰至振玄和兮神宮妙
意賞山波兮夙兮積軒非徒歌兮致命遂志寶中阿兮

士不遇賦

董仲舒

嗚乎嗟乎遐哉邈矣時來曷遲去之速矣屈意從人非
吾徒矣正身俟時將就木矣悠悠偕時豈能覺矣心之
憂歟不期祿矣皇皇匪寧祗增辱矣努力觸藩徒摧角
矣不出戶庭庶無過矣重曰生不丁三代之盛隆兮而
丁二季之末俗以辨詐而期通兮貞士耿介而自束雖
日三省於吾身兮繇懷進退之惟谷彼寔繁之有徒兮
指其白而爲黑目信媢而視眇兮口信辨而言訥鬼神
不能正人事之變矣兮聖賢亦不能開愚夫之違惑出
門則不可以偕往兮藏器又出其不容退洗心而內訟
兮亦未知其所從也觀上古之清濁兮廉士亦營營而
靡歸殷湯有卞隨與務光兮周武有伯夷與叔齊卞隨
務光遁跡於深淵兮伯夷叔齊登山而采薇使彼聖人

其繇周遑兮矧舉世而同迷若伍員與屈原兮固亦無
所復顧亦不能同彼數子兮將遠遊而終慕於吾儕之
云遠兮疑荒塗而難踐憚君子之行兮誠三日而不
飯嗟天下之偕違兮悵無與之偕返孰若返身於業業
兮莫隨世而輪轉雖矯情而獲百利兮復不如正心而
歸一善紛既迫而後動兮豈云稟性之惟偏昭同人而
大有兮明謙光而務展遵幽昧於默足兮豈舒采而蘄
顯苟肝膽之可同兮奚鬚髮之足辨也

大人賦

司馬長卿

世有大人兮在乎中州宅彌萬里兮曾不足以少留悲
世俗之迫隘兮竭輕舉而遠遊乘絳幡之素蜺兮載雲
氣而上浮建格澤之脩竿兮總光耀之采旄垂旬始以

爲修兮曳彗星而爲髻掉指橋以偃蹇兮又倚拊以
搖盪攬槍以爲旌兮靡屈虹而爲綢紅杳眇以玄潛兮
焱風涌而雲浮駕應龍象輿之蠖略委麗兮驂赤螭青
虬之蚺蟉宛蜒低印天蟠裾以驕驚兮詘折隆窮躩以
連卷沛艾赳螘佻以佻儻兮放散畔岸驤以孱顏踣躅
鞞蟾容以飢羸兮蝟蟉偃蹇怵奠以梁倚糾蓼叫臬踏
煥然霧除霍然雲消邪絕少陽而登太陰兮與真人乎
相求互折窈窕以右轉兮橫厲飛泉以正東悉徵靈寤
而選之兮部署衆神於搖光使五帝先導兮反大一而
從陵陽左玄冥而右黔雷兮前長離而後裔皇斯征伯
僑而役羨門兮詔岐伯使尚方祝融警言而躡御兮清氣

氛而后行也余車而萬乘兮絳雲蓋而樹華旗使句芒
其將行兮吾欲往乎南娛歷唐堯於崇山兮過虞舜於
九疑紛湛湛其差錯兮雜遝膠輻以方馳騷擾衝蕤其
相紛拏兮滂淟決軋麗以林離攢羅列聚叢以龍茸兮
衍曼流爛疹以陸離徑入雷室之砰礚鬱律兮洞出鬼
谷之坳壘威魘徧覽八紘而觀四海兮竭度九江越五
河經營炎火而浮弱水兮杭絕浮階涉流沙奄息葱極
汜濫水娛兮使靈媧鼓琴而舞馮夷時若曖曖將混濁
兮召屏翳誅風伯刑雨師西望崑崙之軋沕荒忽兮直
徑馳乎三危排閭闔而入帝宮兮載玉女而與之歸登
閼風而遙集兮亢鳥騰而一止低徊陰山翔以紆曲兮
吾乃今日覩西王母焉然白首戴勝而穴處兮亦幸有
三足鳥爲之使必長生若此而不死兮雖濟萬世不足
以喜回車竭來兮絕道不周會食幽都呼吸澆溼兮餐
朝霞咀噍芝英兮噉瓊華傑稜尋而高縱兮紛鴻濛而
上厲貫列缺之倒景兮涉豐隆之滂淟騁遊道而脩降
兮驚遺霧而遠逝迫區中隘陝兮舒節出乎北垠遺屯
騎於玄闕兮軼先驅於寒門下崢嶸而無地兮上嶮廓
而無天視眩泯而亡見兮聽敞况而亡聞乘虛亡而上
遐兮超無友而獨存

悲士不遇賦

司馬子長

悲夫士生之不辰愧顧影而獨存恒克已而復禮懼志
行而無聞諒才肆而世戾將逮死而長勤雖有形而不
彰徒有能而不陳何窮達之易惑信美惡之難分時悠

悠而蕩蕩將遂屈而不伸使公於公者彼我同兮私於私者自相悲兮天道微哉吁嗟闊兮人理顯然相傾奪兮好生惡死才之鄙也好貴夷賤哲之亂也炤炤洞達胸中割也昏昏罔覺內生毒也我之心矣哲已能忖我之言矣哲已能選沒世無聞古人惟耻朝聞夕死孰云其否逆順還周乍沒乍起無造福先無觸禍始委之自然終歸一矣

逐貧賦

楊子雲

楊子遁世離俗獨處左隣崇山右接曠野鄰垣乞兒終貧且窶禮薄義弊相與羣聚惆悵失志呼貧與語汝在六極投棄遐荒好爲庸卒刑戮是加匪惟幼稚嬉戲土砂豈非近隣接屋連家恩輕毛羽義薄輕羅進不由德

退不受呵久爲滯客其忌謂何人皆文繡余褐不完人皆稻粱我獨藜飧貧無贊玩何以接歡宗室之燕爲樂不槃徒行負賃出處易不身服百役手足胼胝或耘或耔露體霑肌朋友道絕進官凌遲厥咎安在職汝爲之舍汝遠竄崑崙之顛爾復我隨翰飛戾天舍爾登山巖穴隱藏爾復我隨陟彼高岡捨爾入海汎彼栢舟爾復我隨載沉載浮我行爾勸我靜爾休豈無他人從我何求今汝去矣勿復久留貧曰唯唯主人見逐多言益咄心有所懷願得盡辭昔我乃祖宣其剛德克佐帝堯誓爲典則土階茅茨匪彫匪飾爰及世季縱其昏惑饕餮之羣貪富苟得鄙我先人乃傲乃驕瑤臺瓊榭室屋崇高流酒爲池積肉爲嶠是用鵠逝不踐其朝三省吾身

謂予無讐處君之家福祿如山忘我大德思我小怨堪
寒能暑少而習焉寒暑不忒等壽神仙桀跖不顧貪類
不干人皆重蔽子獨露居人皆怵惕子獨無虞言辭既
罄色厲目張攝齊而興降階下堂誓將去汝適彼首陽
孤竹二子與我連行余乃避席辭謝不直請不貳過聞
義則服長與汝居終無厭極貧遂不去與我遊息

慰志賦

崔篆

嘉昔人之遘辰兮美伊傳之選時應規矩之淑質兮過
班倕而裁之協準矧之貞度兮同斷金之玄策何天衢
於盛世兮超千載而垂績豈脩德之極致兮將天祚之
悠適愍余生之不造兮丁漢氏之中微氛霓鬱以橫厲
兮羲和忽以潛暉六柄制于家門兮王綱摧以凌運黎

共奮以跋扈兮羿浞狂以恣睢睹媿臧而乘釁兮竊神
器之萬機思輔弼以媮存兮亦號咷以訓咨嗟三事之
我負兮乃迫余以天威豈無能僚之微介兮悼我生之
巖夷庶嗣哲之末風兮懼大雅之所譏遂翕異以委命
兮受符守乎良維恨遭閉而不隱兮違石門之高縱揚
蛾眉於復關兮犯孔戒之治客懿氓蚩之悟悔兮慕白
駒之所從乃稱疾而屢復兮歷三祀而見許悠輕舉以
遠遁兮託峻崑以幽處埒潛思於至蹟兮騁六經之奧
府皇再命而紹卹兮乃眷乎建武運攬槍以電掃兮清
六合之士宇聖德滂以橫被兮黎庶愷以鼓舞闢四門
以博兮彼幽牧之我舉分畫定而計決兮豈云賁乎彼
鄙苟遂懸車以繫馬兮絕持俗之進取歎暮春之成服

兮闔衡門以掃軌聊優游以永日兮守性命以盡齒貴
啓體之歸全兮庶不忝乎先子

顯志賦

馮敬通

開歲發春兮百卉含英甲子之朝兮泪吾西征發仞新
豐兮裴回鎬京陵飛廉而太息兮登平陽而懷傷悲時
俗之險阨兮哀好惡之無常乘衡石而意量兮隨風波
而飛揚紛綸流於權利兮親雷同而妬異獨耿介而慕
古兮豈時人之所熹沮先聖之成論兮題名賢之高風
忽道德之珍麗兮務富貴之樂耽遵大路而裴回兮履
孔德之窈冥固衆夫之所眩兮孰能觀於無形行勁直
以離尤兮羗前人之所有內自省而不慙兮遂定志而
弗改欣吾黨之唐虞兮愍吾生之愁勤聊發憤而揚情

兮將以薄夫憂心往者不可攀援兮來者不可與期病
沒世之不稱兮願橫逝而無由陟雍時而消搖兮超略
陽而不反念人生之不再兮悲六親之日遠陟九峻而
臨寥薛兮聽涇渭之波聲顧鴻門而歛歔兮哀吾孤之早
零何天命之不純兮信吾罪之所生傷誠善之無辜兮齋
此恨而入冥嗟我思之不遠兮豈敗事之可悔雖九死
而不眠兮恐余殃之有再淚汎瀾而雨集兮氣滂淖而
雲披心怫鬱而紆結兮意沈抑而內悲瞰太行之嵯峩
兮觀壺口之崢嶸悼丘墓之蕪穢兮恨昭穆之不榮歲
忽忽而日邁兮壽冉冉其不與耻功業之無成兮赴原
野而窮處昔伊尹之干湯兮七十說而乃信臯陶釣於
雷澤兮賴虞舜而後親無二士之遭遇兮抱忠貞而莫



達率妻子而耕耘兮委厥美而不伐韓盧抑而不縱兮
騏驥絆而不試獨慷慨而遠覽兮非庸庸之所識卑衛
賜之阜貨兮高顏回之所慕重祖考之洪烈兮故收功
於此路循四時之代謝兮分五土之刑德相林麓之所
產兮嘗水泉之所殖修神農之本業兮採軒轅之產策
追周弃之遺教兮軼范蠡之絕迹陟隴山以踰望兮眇
然覽於八荒風波飄其並興兮情惆悵而增傷覽河華
之泱泱兮望秦晉之故國憤馮亭之不遂兮愠去疾之
遭惑流山岳而周覽兮徇碣石與洞庭浮江河而入海
兮泝淮濟而上征瞻燕齊之舊居兮歷宋楚之名都哀
羣后之不祀兮痛列國之爲墟馳中夏而升降兮路紆
軫而多艱講聖哲之通論兮心愒憶而紛紜惟天路之

同軌兮或帝王之異政堯舜煥其蕩蕩兮禹承平而革
命并日夜而幽思兮終涂憚而洞疑高陽頹其超遠兮
世孰可與論茲訊夏啓於甘澤兮傷帝典之始傾頌成
康之載德兮詠南風之歌聲思唐虞之晏晏兮揖稷契
與爲朋苗裔紛其條暢兮至湯武而勃興昔三后之純
粹兮每季世而窮禍弔夏桀於南巢兮哭殷紂於牧野
詔伊尹於亳郊兮享呂望於鄆州功與日月齊光兮名
與三王爭流揚朱號乎衢路兮墨子泣乎白絲知漸染
之易性兮怨造作之弗思美關雎之識微兮懲王道之
將崩拔周唐之盛德兮摅桓文之譎功忿戰國之遘禍
兮憎權臣之擅疆黜楚子於南郢兮執趙武於溴梁善
忠信之救時兮惡詐謀之妄作聘申叔於陳蔡兮禽荀

息於虞號誅犁鉏之介聖兮討臧倉之愬知嬖子反於
彭城兮爵管仲於夷儀疾兵革之寢滋兮苦攻伐之萌
生沈孫武於五湖兮斬白起於長平惡叢巧之亂世兮
毒縱橫之敗俗流蘇秦於涇水兮幽張儀於鬼谷澄德
化之陵遲兮烈刑罰之峭峻燔商鞅之法術兮燒韓非
之說論誚始皇之跋扈兮投李斯於四裔滅先王之法
則兮禍寢淫而弘大援前聖以制中兮矯二主之驕奢
醜女齊於絳臺兮饗椒舉於章華摘道德之光耀兮庄
衰世之眇風衰宋襄於泓谷兮表季札於延陵擬仁智
之英華兮激亂國之末流觀鄭僑於溱洧兮訪晏嬰於
營丘日曠曠其將暮兮獨於邑而煩惑夫何九州之博
大兮迷不知路之南北駟素蚪而馳騁兮乘翠雲而相

伴就伯夷而折中兮得務光而愈明款子高於中野兮
遇伯成而定慮欽真人之美德兮淹躄躄而弗去意斟
慤而不澹兮俟回風而容與求善卷之所存兮遇許由
於負黍軻吾車於箕陽兮秣吾馬於潁潁聞至言而曉
領兮還吾反乎故宇覽天地之幽奧兮統萬物之維綱
究陰陽之變化兮昭五德之精光躍青龍於滄海兮參
白虎於金山鑿巖石而為室兮託高陽以養僊神雀翔
於鴻厓兮玄武潛於嬰冥伏朱樓而四望兮採三秀之
華英纂前修之夸節兮躍往昔之光勳披綺季之麗服
兮揚屈原之靈芬高吾冠之岌岌兮長吾佩之洋洋飲
六醴之清液兮食五芝之茂英捷六枳而為籬兮築蕙
若而為室播蘭芷於中庭兮列杜衡於外術攢射干雜

靡蕪兮構木蘭與新夷光扈扈而煬燿兮紛郁郁而暢
美華芳曄其發越兮時恍惚而莫貴非惜身之埶軻兮伶
衆美之惟悴游精神於大宅兮抗玄妙之常操處清靜
以養志兮實吾心之所樂山峨峨而造天兮林冥冥而
暢茂鸞回翔索其群兮鹿哀鳴而求其友誦古今以散
思兮覽聖賢以自鎮嘉孔丘之知命兮大老聃之貴玄
德與道其孰寶兮名與身其孰親彼山谷而間處兮守
寂寞而存神夫莊周之釣魚兮辭卿相之顯位於子陵
之灌園兮似至人之髣髴蓋隱約而得道兮羗窮悟而
入術離塵垢之窈冥兮配喬松之妙節惟吾志之所庶
兮固與俗其不同既淑儻而高引兮願觀其從容

思游賦

潘安仁

有軒轅之遐胃兮氏仲壬之洪裔敷華頰於末葉兮瞻
靈根於上世準乾坤以幹度兮儀陰陽以定制匪時運
其焉行兮乘大虛而遙曳戴朗月之高冠兮綴太白明
璜製文霓以為衣兮襲采雲以為裳要華電之煜爚兮
珮玉衡之琳琅明景日以鑿形兮信煥驪而重光至美
詭好於凡觀兮脩稀合而靡呈燕石緹襲以莖國兮和
璞遙棄於南荆夏像韜塵于市北兮瓶罍抗方於兩楹
鸞皇耿介而偏棲兮蘭桂肯時而獨榮關寒暑以練真
兮豈改容而爽情感昆吾之易越兮懷暉光之速暮羨
一稔而三春兮尚含英以容豫悼曜靈之靡暇兮限天
晷之有度聆鳴蜩之號節兮恐隕葉于凝露希前軌而
增鶩兮眷後塵而旋顧往者倏忽而不逮兮來者冥昧

而未著二儀泊焉其無央兮四節環轉而靡窮星鳥逝
而時反兮夕景潛且融晏三后之在天兮嘆聖哲之
永終諒道脩而命微兮孰舍盈而戢冲握隋珠與蕙若
兮時莫悅而未遑彼未遑其何恤兮懼獨美之有傷蹇
委而投粵兮庶芬藻之不彰芳處幽而彌馨兮寶在
夜而愈光逼區內之迫脅兮思攄翼乎八荒望雲階之
崇壯兮願輕舉而高翔造庖犧以問象兮辨吉繇於姬
文將遠遊於太初兮覽形魄之未分四靈儼而爲衛兮
六氣紛以成羣驟白獸於商風兮御蒼龍於景雲簡廝
徒於靈囿兮從馮夷而問津召陵陽於游谿兮旌王子
於柏人前祝融以掌燧兮殿玄冥以掩塵形影影而遂
遐兮氣豐豐而愈新挹玉膏於萊嶠兮掇芝英於瀛濱

揖太昊以假憇兮聽賊政於三春洪範翁而復張兮百
卉隕而更震睇玉女之紛影兮執懿筐於扶木覽玄象
之躡羣兮仍騰躍乎陽谷吸朝霞以療饑兮降廩泉而
濯足將從轡以逍遙兮恨東極之路促詔織阿而右迴
兮覲朱明之赫戲葢群神於夏庭兮迴蒼梧而結知纏
焦明以承旂兮駟天馬而高馳讒義和於丹丘兮誚倒
景之亂儀尋凱風而南暨兮謝太陽於炎離歲溽暑之
陶鬱兮余安能乎留斯聞碧鷄之長晨兮吾將往乎西
游奧浮蠲於弱水兮泊舳艫兮中流苟精粹之攸存兮
誠沈羽以舟軼望舒以陵厲兮羗神漂而氣浮訊碩
老於金石兮采舊聞於前脩譏淪陰於危山兮問王母
於椒丘觀玄鳥之參趾兮會根一之神籌擾冕兔於月

窞兮詰姮娥於蓐收爰攬轡而旋驅兮訪北叟之倚伏
乘增水而遂濟兮凌固陰之所瀆探龜蛇於幽穴兮瞰罔
養之潛育晒倏忽之躁狂兮喪中黃於且目偃燭龍而
游衍兮窮大明於北陸蹙招搖而上躡兮忽蹈廓而凌
虛登閭闔而遣眷兮頰玄黃於地輿召黔雷以先導兮
覲天帝於清都觀渾儀以寓目兮拊造化之大鑪爰辨
惑於土皇兮稽吉凶之元符唐則天而民咨兮矣亂常
而感虞孔揮涕於西狩兮臧考祥於婁句距肆暴而保
乂兮顏履仁而夙徂何否泰之靡所兮眩榮辱之不圖
運可期兮不可思道可知兮不可為求之者勞兮欲之
者惑信天任命兮理乃自得且也四位為匠乾坤為均
散而為物結而為人陽降陰升一替一興流而為川滯



而為陵禍不可攘福不可徵其否兮有豫其泰兮有數
成形兮未察靈像兮已固承明訓以發蒙兮審性命之
靡求將澄神而守一兮奚颺颺而遐游斐陳辭以告退
兮主悖惘而永歎惟升降之不仍兮詠別易而會難願
大響以致好兮息駕於一食會司儀於有始兮延嘉
賓於九乾陳鈞天之廣樂兮展萬舞之至歡枉矢鑠其
在手兮狼弧翔其斯鸞睨翟犬於帝側兮殪熊羆於靈
軒爾乃清道夙蹕載輪脩祖班命受號轡整旅兆司
鬱以屆路兮萬靈森而陳庭豐隆軒其警衆兮鉤陳帥
以屬兵堪輿竦而進時兮文昌肅以司行抗蚩尤之脩
旃兮建雄虹之采旌乘雲車電鞭之扶輿委移兮駕應
龍青虬之容裔陸離俯遊光逸景倏爍微霍兮仰流旌

垂旄焮攸截纏前湛湛而攝進兮後傑傑而方馳且啓
行於重陽兮奄稅駕乎少儀跨列缺兮闕乾坤揮玉關
兮出天門涉漢津兮望崑崙經赤霄兮臨玄根觀品物
兮終復魂形已消兮氣猶存眺懸舟之離離兮懷舊都
之藹藹仍繁榮而督引兮將造降而速邁華雲依罪而
翼衡兮日月炫晃而映蓋蹈烟煴兮辭天衢心闔翕兮
識故居路遂適兮情欣欣奄忽歸兮反常閭脩中和兮
崇彝倫大道繇兮味琴書樂自然兮識窮達澹無思兮
心恒娛

廣文選卷第五

江都葛澗校

廣文選卷第六

明通議大夫都察院右副都御史大庾劉節廣

志下

逸民賦

陸士龍

富與貴人之所欲也而古之逸民或輕天下細萬物而
欲專一丘之歡擅一壑之美豈不以身聖於宇宙而恬
貴於紛華者哉故天地不易其樂萬物不干其心然後
可以妙有生之極享無疆之休也乃爲賦云

世有逸民兮栖遲乎於一丘委天形之外心兮淡浩然
其何求陋此世之險隘兮又安足以盤遊杖短策而遂
往兮乃枕石而漱流載營抱魄懷元執一傲物思寧妙
世自逸靜芬響於未言滅絕景於無質相荒土而卜居